




東華錄

七





內閣文庫		
番號	漢	8881
冊數	32	(7)
函號	286	97



東華錄卷之七

湘源蔣良騏于之父

順治九年三月大學士范文程等言會試中式第一名舉人程可則文理荒謬首篇尤悖戾經注命革中式並治考官罪 鄭親王等會議信親王多尼父豫王與睿王同胞兄弟原議盡削王爵但以行兵有功應降為多羅郡王從之 是月予故御史張煊祭一壇並全葬 革內翰林秘書檢討唐夢賚賤以張煊優卹已經刊布中外夢賚復藐旨冒竇具奏陰附洪承疇陳名夏故也 四月孔有德奏



粵西思南慶橫等二十二府州縣盡入版圖又僞國公陳
邦溥殺僞宣國公焦璠率溥州郡縣投誠 六月大學士
范文程疏題翰詹陞補畫一之法修撰編檢按科分先後
次序陞轉凡奉差終養丁憂治喪依限到京者仍照科分
次序違限者計所違月日序于後給假告病者槩序于後
降補別衙門復回者照現補官品級爲序三品官服闋病
痊者由撫按具奏臣衙門題補四品以下官親身赴京亦
由臣衙門題補永著爲例 七月偏沅巡撫報逆賊孫可
望當作李定國陷廣西省城定南王孔有德自縊

欽天監正湯若望進渾天星毬地平日晷等儀器 浙閩
督陳錦領兵征鄭成功至漳州灌口爲家丁刺殺 諭內
三院內外題本奏本先已飭禮部發式通示及見內外本
章尙有長短寬窄違式參差者卽傳諭禮部嚴加申飭務
使畫一 命和碩敬謹親王尼堪爲定遠大將軍統兵征
湖廣貴州以張獻忠餘孽孫可望等侵擾也 吳三桂等
疏報攻拔重慶等府勦殺僞總兵李廷明又分兵圍成都
僞撫南王劉文秀舉城降進攻嘉定斬僞總兵龍名揚
八月諭尼堪等毋往貴州從湖南進取寶慶入廣西搜勦

東華金 卷一
餘孽 諭吳三桂等毋進貴州相機安定四川 九月命
前鋒統領阿尔津爲定南將軍同都統馬喇希往征廣東
未定州縣 十月尙可喜耿繼茂奏報恢復海南言臣于
五月中南下遣兵攻克欽灵於傷總兵袁騰傷侯李元蔭
傷伯周朝等傷侯張月等同傷平西王朱聿鎮縛賊渠李
明忠來降 尙可喜報克復梧州城 吳三桂奏孫可望
遣兵薄保寧城下臣親迎敵賊大潰斬傷將軍王復臣等
一調阿尔津爲安西將軍同馬喇希鎮守漢中以賊犯四
川也 十一月命都統卓羅爲靖南將軍同都統藍拜統

兵征廣東未定州縣 大學士范文程入見

上語曰朕夢列旂吹角對天稽首復見敵兵射來三四矢
俱手接之未及身又夢天遣五人言默助毋躬其狀悉如
素識范文程曰迺者命敬謹親王討賊想渠魁就於耳且
對天稽首天心默佑兆俱吉甚 諭禮部明末寇陷都城
君死社稷當時文武諸臣中豈無殉君死難者幽忠難泯
大節可風尔部會同院部衙門詳訪確查死節職名併寔
迹具奏勿遺勿濫 辰常總兵徐永興與黔寇白文選戰
敗死之一 敬謹親王尼堪歿于陣追封莊親王 十二月

莊親王

江西撫蔡士英奏官兵恢復安福永新二縣 調阿尔津
爲定南將軍同馬喇希統兵征湖南逆賊 諭刑部巨盜
李應試潘學文盤踞都下多歷年所官兵莫敢撓其鋒今
因別事發覺審得李應試別名黃臙李三元係明朝重犯
漏網出柙專一豢養強盜交結官司役使衙蠹遠近盜賊
競輸重貲南城舖行盡納常例明作威福暗操生殺他若
崇文門一應稅務自立規則擅抽課錢惡姪殺人死者家
不敢申訴諸如此類罪不可勝數潘學文自称馬販潛通
賊線挑聚臙健馬騾接濟遠近盜賊每次多或一二百匹

少或數十匹羣盜得騎如虎添翼且交通官吏包攬不公
不法之事任意興滅甚至文武官員多與投刺會飲道路
側目莫敢誰何以上二犯罪大惡極舉國官民人等皆言
罪當萬死故將李應試潘學文併伊子姪俱行斬梟又兵
科都給事中李運長身爲言官反與應試之姪李天鳳聯
宗認爲兄弟將天鳳之子李蔡冒作己子充送官監及事
覺仍藏匿天鳳子希圖倖免姑從寬典止誅李運長李蔡
以後各衙門勿得徇縱以取罪戾再有與奸盜往來者事
發定行連坐 是歲人丁戶口一千四百四十八萬三千

八百五十八田地山場四百三萬三千九百二十五頃四
畝有奇畦地二萬二千九百八十徵銀二千一百二十六
萬一千三百八十三兩五錢有奇米麥豆五百六十三萬
八千七百一十一石一斗有奇草五百二十一萬六千八
百四十束茶三萬七千一百七十八筥行鹽三百七十四
萬六百二十三引徵課銀二百一十二萬二千一十四兩
二錢有奇鑄制錢二十萬九千七百六十三萬三千八百
五十有奇銅錢二千萬一千二百一十有奇鈔二十二萬
八千一百七十二貫四百七十有奇

順治十年正月庚午諭內三院朕自親政以來各衙門奏
事但有滿臣未見漢臣朕思大小臣工皆朕腹心手足凡
進奏本章內院六部都察院通政大理等衙門滿漢侍郎
卿以上會同來奏其奏內事情或未當者可以顧問商酌
爾等傳諭諸臣務懃朕懷各竭公忠盡除推諉以昭一心
一德之盛 辛未諭內三院近來言官條奏多係細務未
見有規切朕躬者朕一日萬幾豈無未合天意未順人心
之事良由諸臣畏憚忌諱不敢進諫耳朕雖不德于古帝
王納言容直每懷欣慕朕躬如有過失諸臣須直諫無隱

東華錄 卷十一 五
卽有未合不妨再三開陳庶得省改力行正直希臻治平
進言切當者必加旌獎言之過贛者亦不譴責卽傳諭大
小諸臣工俾咸悉朕意 工科愛惜喇庫哈番散都給事
中姚文然言近兵部大臣皆因得罪縉禁發問天寒地凍
日久成疾且通衢大路功貴大臣帶鎖褻辱非所以廣
皇仁而存國體得

旨以後滿漢諸臣有犯貪惡重大事情應發刑部者在部
守候不必鎖拏送問審有寔拋引律擬罪奏請處分 定
遠大將軍敬謹親王等奏捷云九年十一月十九日大兵

抵湘潭縣偽將軍馬進忠等遁寶慶臣率兵向衡州進發
屢敗賊兵二十三日抵衡州大敗賊兵追殺二十餘里斬
獲甚衆 給事中王廷諫言盜賊恃窩主爲巢窟乃敢爲
窩主者非地方豪惡卽投充莊頭也力足以轉變勢足以
庇護請自後追問窩主如係莊頭及投充人等卽行擒拏
解部從之 命貝勒屯齊爲定遠大將軍統大兵征勦湖
南 諭護軍統領阿尔津韓岱宜尔德等率師往會湖南
大兵

上幸內院諭大學士等黃騰李三一細民耳住居外復多

東華錄 卷一
造房屋每間修飾齊整其何故也洪承疇對曰其房屋分照六部或某部人至或自外來有事某部者卽入某部房內毋敢撻越

上曰以一細民而越分妄行如此故天使之敗耳

上又曰李三爲民大害諸臣畏不敢言鞠審日甯完我陳之遴默無一言鄭親王詰之之遴始曰李三巨惡誅之則已倘不行正法之遴必被陷害此豈非重身家性命者乎名夏日李三雖惡一御史足以治之臣等叨爲大臣發奸摘伏非臣所司且李三廣通線索言出禍隨顧惜身家亦

人之恆情也 二月浙閩總督劉清泰言臣遵密諭細察

廈門一窟素稱鄭逆老巢撫臣張學聖道臣黃樹鎮臣馬得功垂涎金穴乘成功他出潛師往襲悉攫其家貲以致鄭逆索償修怨海郡淪陷命禡三人及按臣王應元職解

京嚴訊

上幸內院閱通鑑問漢高文光武及唐太宗宋太祖明太祖孰優陳名夏日唐太宗似過之

上曰不然明太祖立法周詳可垂永久歷代之君皆不能及也 又諭各部有兩滿尙書者裁其一 三月

東華錄 卷一
上幸內院覽少詹事李呈祥疏部院衙門應裁滿官端任漢人顧謂大學士洪承疇等曰李呈祥此疏大不合理朕不分滿漢一體眷遇委任爾漢官奈何反生異意若从寔而言首崇滿洲理所宜也一賜太常寺卿管理欽天監事湯若望號通元教師 四月辛巳

上幸南臺持弓顧謂諸臣曰我朝定天下以此弓朕于每年出獵二三次練習騎射今天下之大机務繁冗一應章奏朕躬親爲批斷身雖不暇心常念茲不忘諸臣曰皇上居安思危眞天下之福臣等願

皇上始終常存此念耳

上曰卿等恐朕志不堅有違此言朕自堅厥志卿等亦當堅心輔朕使天下乂安 諭各衙門本章內漢字宜先書官員銜名次書謹題字樣次書所條陳爲某事 諭工部睿王坟園因伊罪惡竟行廢壞似屬不忍其房屋門牆俱着修理柱用黑色仍命信郡王撥人看守

上御太和門親試兼翰林銜吏部侍郎成克鞏禮部侍郎張瑞及內三院學士劉正宗編檢以上官六十二員君子懷德論一篇請立常平疏一道 諭吏部國家官人內外

互用方見真才朕親試詞臣量爲分別有堪授外任者檢
討以上官照詞臣外轉舊例優與司道員缺衰病者聽其
請告朕仍優遣之 命察核六部都察院卿寺各衙門所
屬官員 偏沅巡撫奏拏獲故明福親王嫡子朱由杞得
旨卽在彼處正法 欽天監奏連日夜見火星逆行房宿
初度在黃道南宜防火災 以旱下詔求直言省刑獄
五月停止各省巡按其十四道京畿道御史止留二十員
餘俱裁 命駐防江寧府昂邦章京哈木爲靖南將軍
往征廣東逆寇 命大學士洪承疇爲太保都察院右副

都御史兼太子太師內國史翰林院大學士兵部尙書經
畧湖廣廣東廣西雲南貴州等處地方總督軍務兼理糧
餉聽擇扼要處所駐札撫提鎮以下悉聽節制 六月設
廣東廣西總督一員以李率泰爲之 戶工兵三部遵諭
改折各直省本色錢糧歸于一條鞭法總收分解永爲例
從之 定遠大將軍多羅貝勒屯齊奏二月二十八日大
軍抵永州僞安西王李定國遁走龍虎關去三月初十日
我軍向寶慶進發十五日宿岔路口僞秦王孫可望自靖
州來與馮夔札白文選馬進忠諸賊合我軍分擊大敗之

東華錄 卷七
九
斬獲無算 新廣東左布政使胡章言臣聞靖南王耿繼茂平南王尚可喜藩下官兵有擄掠鄉紳婦女及占拋藩司公署濫委官員事命二王回奏十一年正月耿繼茂疏辯胡章所劾兵丁肆掠一事前大兵抵廣州城中死拒闕九月乃下士卒殮風宿雨砲擊鋒傷不知凡幾城下之日卽食肉寢皮未足以洩其恨城中皆爲賊黨俘獲寔多至兵占官署官占民房此殆入城時有之其後酌以北城住兵馬南城居百姓一切文官分住南城料理民事至布政使衙門仍存作公署安得謂到任無所耶十一年六月胡

章因革取下刑部究問以其失寔也 辛亥賜故明确准大學士范景文戶部尙書倪元璐左都御史李邦華副都御史施邦耀左庶子周鳳翔左中允刘理順馬世奇檢討汪偉太常寺少卿吳麟徵都給事中吳甘來御史王章陳良謨主事成德金鉉駙馬都尉鞏永固及太監王承恩等十六人諡並給田勅有司致祭 設內三院漢官大學士各三員 內院題請以翰林院五品以下官提督直隸江南江北學政其習滿書者不差報可 閏六月諭內院乃者淫雨連月都城內外積水成渠房舍傾壞薪桂米珠甚

東華錄 卷一
者傾壓致死深可軫念皆朕不德所致朕當一意修省祇
懼天戒大小臣工各盡職業共圖消弭該部確察被災戶
口拋寔奏聞 戶科給事中周曾發言頃者造建乾清宮
數月以來雷燬先農壇門又霖雨連綿沒田禾壞廬舍竊
考五行之數土不能制水則水濫水濫則土陷而木浮
皇上有事于土木而天心示儆匪一端伏乞暫緩興工
云得
旨這本說的有理 七月都察院承政屠賴言請暫停乾
清宮工及不必專立司札監衙門名色得

旨所奏甚是但衙門雖設事權不在寺人乾清宮物料已
辦仍遵前旨行 鄭親王傳集諸王貝勒及部院堂上官
會訊以兩潦累常請暫停殿工以錢糧賑濟軍民從之
戶部等會議以後鑄錢務照定式每文重一錢二分五厘
精工鑄造背面鑄一厘字每千文作銀一兩有不遵者治
以罪允行 聞喀爾喀部落相約率兵向內命多羅安郡
王岳洛爲宣城大將軍統兵戍防歸化城 八月以
太宗皇帝第十四女和碩公主下嫁吳三桂子應熊 諭
禮部自古立后皆慎重遴選使可母儀天下今后乃睿王

東華金 卷一
于朕幼時因親定婚未經選擇官闈參商已歷三載淑善
難期不足仰承

宗廟之重謹于八月二十五日奏聞

皇太后降為靜妃改居側宮 九月耿繼茂哈七木克復

潮州 十月庚午昏刻水木二星合于女宿度十一月庚

子夜金星與木星在女宿 十二月命都統陳泰爲定南

靖寇大將軍同都統藍拜濟什哈命纛章京蘇克薩哈等

統兵駐鎮湖南以孫可望等蹂躪湖南也

順治十一年正月海寇犯崇明靖江泰興官兵擊走之

海寇犯金山 二月尙可喜專鎮廣東耿繼茂移駐桂林

三月大學士甯完我劾大學士陳名夏結黨懷奸情事

叵測其畧曰陳名夏痛恨我朝薙髮鄙棄我國衣冠曾謂

臣曰要天下太平只須留頭髮復衣冠臣思我國能一天

下以衣服便于騎射之故也今名夏欲寬衣博帶是計弱

我國也一名夏父子居鄉暴惡士民怨避居江寧國公花

園中此園例應入官價值十萬金江寧各官公捐三千兩

代爲納贖其子掖臣包占故明吏部吳昌時女橫行江寧

城中坐大橋列棍扇說人情納賄賂一趙延先不當陞而

陞名夏反欲處言官而罪同列甄別翰林本出

聖裁而名夏直任去留由已攬權欺詐一名夏姻親史儒
綱任浙江道時誣朱秀才爲故明宗支抄其家貲巨萬逼
其親人性命浙撫蕭起元被劾賍私奉

旨革職提問名夏利其田宅許其開贓復官此案八年未
結一探花張天植告假回南名夏助銀百兩天植于伊妻
子處還本利五百兩名夏不知以爲騙已故言天植得罪
于我所以外轉及還銀信到見天植又曰還汝翰林可也
一吏科魏象樞係名夏姻親結爲一黨象樞誤叅司官錢

受祺擅委中軍後自檢舉部稟受祺無罪免議象樞降級
調用名夏輒票部本罰俸六個月一臣寺公立一簿于分
票事件下各親書姓氏以防推諉一日名夏將公簿註姓
塗抹一百十四字不知作弊又在何件一上命內大臣傳
出科道結党諭旨臣書稿底名夏抹出擠異排孤一語改
明季埋沒局中因而受禍今方馳覲域外豈容成奸四語
名夏糾党奸究情形恐

皇上看破故欲以隻手障天地

云

吏部等衙門會鞫俱

寔着處絞 戊申

聖祖仁皇帝生 命詹事翰林寺官陞補俱歸吏部從大
學士范文程等請也 四月御史高尔位奏還來奸徒營
謀委署州縣佐貳昔之衙蠹地棍今之典史敢雖卑而有
父母之呼兼有巡捕之責無敢而官非該管道府受賄因
何濫委如任縣典史楊顯耀等槩係積蠹快皂惡棍鑽營
代捕小民莫敢誰何請飭部行督撫確查遴委違者重處
得

旨允行 御史牟雲龍條奏五事一漕白折乾之弊當除
一劣生包攬之害宜革一生育充當里長宜禁一八旗分

防不宜更調一官設買賣人宜止章下所司 鞫訊大學
士陳名夏子掖臣倚恃父勢恣行不法諸事俱寔論斬得
旨免死決杖遣戍盛京 五月吳三桂劾奏原任四川巡
按郝浴飾詞冒功免死流盛京 六月以都統朱瑪喇爲
靖安將軍勦廣東賊寇 十月尙可喜耿繼茂奏報逆賊
李定國猝陷高明復圍新會請速發禁旅下兵部 十二
月命世子濟度爲定遠大將軍征勦鄭成功 尙可喜等
奏與靖南將軍朱瑪喇合兵屢敗賊兵李定國遁走新會
圍解 命都統明安達禮統兵征羅刹于黑龍江

東華金 卷一
順治十二年正月廣西斬土賊偽總兵廖篤增于玉版泉
吏部遵諭開列科道寺從前言事不當及糾叅失寔革
降者向玉軒等四十人原案情由奏請復吳達等七人官
左都御史屠賴等言爰民莫先除害近聞八旗投充之
人自帶本身田產外又任意私添或指附近之地拋爲已
業或連他人之業隱避差徭被占之民旣難控訴國課亦
爲虧減上下交困莫此爲甚宜勅戶部將投充之人照原
投部檔查核給地外其多占地畝卽退還原主庶民累稍
甦而賦租亦增矣又年來因逃人衆多立法不得不嚴但

逃人三次始絞而窩主一次卽斬又將哈佑流徙似非法
之平也竊謂逃人如有窩主者逃人處死卽將窩主家產
人口斷給逃人之主兩哈甲長責懲該管官員議處無窩
主者仍鞭一百給主其自投歸主及窩主出首者俱照例
免議庶逃人少而無辜之抹連者亦少矣得

旨下部議 再如建言降革諸科道已蒙特旨令吏部開
列事由奏請矣查禮部郎中郭一鵬流徙詞臣李呈祥侍
郎魏瑄等其罪寔由于進言似應一体開列庶不虛宥過
惜才之盛典得

東華錄 卷一
旨着王大臣等會議具奏 給事中李祖言逃人一事立法過重株連太多使海內無貧富無良賤無官民皆惴焉莫保其身家可爲痛心者一也法立而犯者重勢必有以逃人爲奇貨縱令索詐則富家立破禍起奴婢則名分蕩然可爲痛心者二也犯法不貸牽引不原卽大逆不道無以過此且破一家卽耗朝廷一家之供賦殺一人卽傷朝廷一家之培養古人十年生之十年教之今乃以逃人一事戕之乎可爲痛心者三也人情安居何苦相率而逃至三萬之多不以恩義維繫其心而但以法窮其所往可

爲痛心者四也卽曰捕獲以後起解質審道途騷擾冤陷寔煩滋蔓不已生齒凋蔽可爲痛心者五也且飢民流離地方官以挨查逃人故閉閤不納嗟此窮黎朝廷日捐租煮賑衣而食之奈何以酷法苛令迫而斃之乎可爲痛心者六也婦女彳亍于原野老稚僵仆于溝渠雖有力者勢必挺而走險今寇孽未靖何爲復驅赤子作賊乎可爲痛心者七也

旨令會議未幾流徙尙陽堅

副理事官彭長庚言諸王俱樹勲勞而睿王之功爲冠當

東華金 卷十
太宗上賓堅持盟誓扶立

皇上迨郡王阿達札貝子碩託私謀擁戴睿王持大義立置典刑後睿王大權在握於時

皇上冲齡遠在盛京彼若肆然自帝誰能禦之而先驅底定恭迎盜輿此其功烈誠不可泯也是以當其初薨尙無異議乃爲時無幾朝議紛起論事削爵毀滅過甚卽肅王妃竇乱一事愆尤莫掩然而功多罪小應存議親議故之條至于私匿帝服及御用等物必由彼傳諭織造早晚齋送進御彼時暫停王府豈可與一切私匿御用者同例而

議爲不軌也方今水旱相繼似同風雷之警或其中不無冤抑乞賜昭雪命王大臣密議 二月停止滿兵攜帶家口駐防武昌一耿繼茂尙可喜奏官兵敗李定國干興業縣及橫州

按定國竄入南寧府粵東高雷廉三府三州十八縣及粵西橫州等二州四縣至是悉平

三月侍郎趙開心以飢民流離可憫請暫寬逃人之禁得旨趙開心沽譽市恩著降五級調用 一寺子許尔安許國之子言睿王罪固難辭而功亦不可泯也乞篤親七之誼

東華錄 卷七
隆敬大臣之典 云 命密議 議政王貝勒大臣等議彭
長庚欺誑妄言大于國紀許爾安與長庚無異均應斬立
決得

旨皆流徙寧古塔 四月主事達都劾御史張嘉請停滿
洲關差以滿官奉差者秉公守法必不徇私故張嘉嫉忌
旨張嘉著降一級調用 五月命都統石廷柱爲鎮海將
軍駐防京口 六月吏部郎中宋學洙以典試河南宿娼
受餽革職 寧南靖寇大將軍陳泰疏報僞將軍盧明臣
僞興國侯馮夔禮攻岳州武昌僞安南王刘文秀攻常德

護軍統領蘇克薩哈伏兵邀擊賊大敗明臣赴水死夔禮
被重創文秀遁走貴州 嚴禁沿海省分無許片帆入海
違者置重典 七月給事中李開生言家人自通州來云
有使者封船奉

旨往揚州買女子 云 部議李開生不知乾清宮需用器
皿差人採辦妄聽訛言瀆奏沽名流徙尙陽堡 時寧南
靖寇大將軍陳泰卒于軍八月以都統阿尔津爲寧南靖
寇大將軍同都統卓羅統大軍駐防荊州都統祖澤潤分
防長沙以孫可望騷擾湖南也 九月朱瑪喇等班師還

東華錄 卷十
京 十月兵部右給事中張文光疏請遇大小文武官員
病故俱照生前品級填給勘合兵部議准行紅本 十月
以舟山副將杞成功從賊命都統伊爾德爲寧海大將軍
率兵征之

順治十三年浙閩總督屯泰奏自舟山失守海寇直至台
州副將馬信叛變猷城 二月令兩廣總督移駐梧州從
洪承疇請也 耿繼茂奏我師抵南寧李定國奔隆安擒
僞伯李先芳斬僞叅將杜紀等

上諭諸漢臣曰人心澆薄受業師畧不致禮惟以考試官

爲師以理論受業師自幼教育宜始終敬謹相待若考官
朕所遣也豈受業比哉自後明示禁革 四月阿尔津奏
大破賊渠姚黃于彝陵之蛇倒退山招撫俘挾無算 浙
撫秦世再以造战船伐宋陵樹木事聞得

旨前伐陵原有明禁何得不候旨徑行着議處伐過樹木
照前裁補 七月世子濟度奏鄭成功部下總兵黃梧副
將蘇明鄭純等謀斬僞總兵華棟並殲其部兵猷海澄縣
投誠封梧爲海澄公并授蘇明鄭純官職 九月寧海大
將軍伊爾德奏海逆僞總兵王良樹毛光祐沈尔序等犯

大蘭山遣兵敗斬之臣親趨定海縣敗賊于衡水洋口斬賊渠陳六御阮思遂取舟山十月阿尔津奏克復辰州土司彭宏澍籍所屬三州六司三百八十洞戶口以降十一月海賊鄭成功陷閩安鎮犯福州轉掠浙江温台等郡湖廣巡撫員缺吏部擬列柳寅東名進給事中姚延啟疏劾寅東前任順天巡撫時濫給盜党倪先在叅將牌劄且年老才庸請勒令休致下部議寅東精力已衰應以巡撫銜致仕從之

東華錄卷之七終

